

Lamentablemente 99% di e discusion tabata basa riba emocion:

Minister Bermudez: CAFT no ta “curatela” y no ta contene medida


ORANJESTAD(AAN): Minister Angel Bermudez di Finansa den un entrevista tocante e ley pa supervision di finansa publico, CAFT, a comparti cu ta lamentable cu 99% di e discusion den parlamento tabata mas bien expresionnan di emocion y cu no tabatin debate real riba e contenido di e ley.

Tambe, el a menciona cu palabranan manera “curatela” y “medida” a cay, pero cu e ley aki no tin nada di haci cu ni curatela, ni medida, y tampoco cu e entrega di autonomia of Status Aparte.

El a splica cu e concepto di ley CAFT ta encera reglanan cu mester worde aplica den e maneho di finansa publico y particularmente e tin di haber cu e fechanan fatal (“deadline”) pa loke ta trata presupuesto y cambionan riba presupuesto, riba e cuentanan annual, y tambe e tin di haci cu calidad di e funcionamiento financiero.

Esaki ta e contenido di e ley cu a cumbini cu Hulanda, despues cu Hulanda a haci un apelacion fuerte riba Aruba pa bin e ley pa asina tin un regimen mas estricto riba finansa publico weitando e situacion cu Aruba tabata y ta aden ainda. E situacion ta un tiki precario, pero ta trahando duro ariba dje cu resultado cu e ta mehorando, segun e mandatario.

Bermudez a splica cu e obhetivo ta pa den algun aña yega na un surplus riba presupuesto y asina por cuminsa paga e isla su debe nacional y trece back na proporcionnan sostenibel.



E nivel di e debe nacional no ta na un nivel sostenibel actualmente.

E minister ta lamenta cu durante di e reunion maratonico den parlamento hopi emocion a hunga papel grandi y basicamente no tabatin debate riba e contenido di e ley, por ehempel con e ley ta funciona y con ta pone den practica.

El a duna como ehempel cu a worde insinua cu e ley ta pone Aruba of parlamento of gobierno bao di curatela, pero si lesa e ley bon den e caso di kier papia di “curatela”, ta e funcionamiento di e minister di finansa lo por a worde poni bao di curatela. “Pasobra e reglanan ta regarda mi departamentonan. E reglanan di e concepto di ley aki tin di haber cu e produccion cu mi departamentonan mester produci durante di aña,” Bermudez a bisa.

El a elabora riba e lista di produccion cu e ta referi na dje, cuminsando cu e concepto

di presupuesto, cu mester cuadra cu cierto normanan cu mester worde ehecuta den e cuadro financiero manera cu el a worde aproba den staten. Un otro producto, ta e cuenta anual cu ta worde controla pa Algemene Rekenkamer, cu tambe ta worde entrega na staten.

Asina tin un proceso pa sigui pa loke ta trata finansa publico cu ta regarda su departamentonan cu e proceso ey ta cay bao di reglanan di CAFT, Minister Bermudez a agrega. El a bisa cu, por ehempel, otro siman e cuenta anual di 2014 lo worde entrega.

Un otro insinuacion cu a worde haci den parlamento ta cu e concepto di ley ta concerni of contene medida. Angel Bermudez a subraya cu e ley “no ta contene niun medida!” Loke e ley ta regla ta comportacion di henter e proceso di finansa publico y pa esey e ta pone regla.

El a bisa cu aplicacion di e ley di CAFT no lo tin e situacion mas cu presupuestonan ta sali un aña laat y cuentanan anual lo sali 15 aña laat, manera a pasa algun tempo pasa cu a saca 15 cuenta anual den un biah.

E titular di finansa a comenta cu e ley ta duna normanan cu ta forma e cuadro financiero, e ley ta bisa kico e deficit mester ta den e añanan benidero y ta worde expresa den e producto bruto nacional (GDP). Otro aña e norma ta 2%, e aña siguiente e ta menos di 1% y despues pa 2018 e ta bolber den un surplus. Na momento cu e muestra un surplus, ta duna espacio pa Aruba

cuminsa paga debe back, y asina ta logra baha tambe e debe nacional.

Bermudez a splica cu e situacion ta comparabel cu loke ta pasa na cualkier cas. Un famia ta spaar pa cumpra cierto cosnan of ta paga debe, manera hypotheek, fianza di auto, etc. pa yega na loke nan kier. Na momento cu tin un deficit den e budget di e hogar tur luna e famia no por paga su debenan y asina ta haya nan mes den problema.

Minister Angel Bermudez a remarca cu wak bon y considera e edad di e personanan den e reunion, e ta practicamente un di e uniconan cu a experiencia e periodo di transito di Status Aparte trahando na Aruba. El a splica cu e tempo ey LAGO a cera, Bolívar a cay, turismo no tabata hunga un rol principal

den economia manera e ta actualmente y Aruba tabata experienciando un crisis grandi y como ambtenaar tambe a worde pidi pa contribui cu 8.2% di su salario na solidariteitsbelasting, pa entrega 0.25% di su salario y, ademá, pa entrega su vakantietoelage pa yuda realisa Status Aparte. El a bisa cu semper tabatin contribucion pa mantene y realisa e Status Aparte.

El a finalisa bisando cu den henter e ley di CAFT, Status Aparte y autonomia no ta al caso ni na discusion y, casi 30 aña pasa el a worde pidi pa contribui na gobernacion y awo tambe e ta dunando su contribucion pasobra e tin e conviccion cu “ora mester yuda pa bay dilanti nos mester hacie”.